

譚友夏合集目錄 卷二十

嶽歸堂已刻詩選

五言律

傳遠度水閣柳下作（同唐宜之茅止生徐

牟父）

夜泛秦淮得愁字（同潘景升冒伯麟洪仲

章）

偶出寺伯敬坐至暮留三詩于壁而去

又過青海林塘（同子丘茂之）

吳疑父七夕招泛烏龍潭尋雨至就泊茅止

生森閣（同冒伯麟許無念宋獻孺洪仲

章）

伯孔客廣陵寄懷

送伯孔還湘潭

攝山道中（止生招疑甫子雲同往）

京口雨進

舟夜寄伯敬

徐牟父曾約同舟訪之嘉興死去二十日矣

解纜傷懷而去

游十八澗贈石佛僧

近西冷橋邊息舟

移宿段橋

月坐法相寺門

鄒孟陽移具法相宿月（同王永啓聞子將

嚴忍公）

答嚴忍公無勅兄弟

一日兩上孤山作

鄰舟詩贈鄒孟陽李縉仲

後鄰舟詩贈葉行可陸嗣端諸子

夜同慧公過宿南屏衡公

同李長蘅尋聞子將龍井山齋二首

其二

過韓求仲同出城看吳興山水

過王修微山莊

無錫答茂之見懷卽以爲別

過沈雨若蔣樹得觀字（同伯麟比玉子丘）

送丘長孺還麻城

太保周公舟枉草堂賦贈（時同令弟華翁）

蘭如見訪題麗人畫爲贈

送王明甫南遊

寄林茂書適塘堤成

集劉繩之宅留別公安諸子

瘳老僕八齋公詩

聞鍾叔敬怪卒于伯敬南邸傷心賦此

送魏定如還南儀曹與伯敬同部

雪夜與譚訥菴同宿

久雪後同弟正則發舟江黃

得伯敬南中書作三詩記其新事

其二

其三

宿恆度上人庵中兼贈王五嶽

雨過汪闡夫山庵二首

其二

過馬冲然郡齋水亭

寄懷王永啓

尋林茂之新巷答其詩

丹陽夜步逢賀氏諸仲

送陳沂公會試

別朗伯自用前韻

僧寒碧見過

喜伯敬自白門到家

漢江看放燈懷黃美中

官舟紀夢（有引）

得蘇州徐元歎書

其二

戲爲納侍兒詩和服膺

其二

寄盧非敖初度

留二十九舅過夏以初秋別去因柬二十四

舅

遠韻弟寄書歸訊答懷

齋堂秋宿

晦夜同弟姪妹僮菴宿

伐先人所種柳爲眞公置菴園內名曰柳菴

遠韻弟新居作

哭舊督學師周鉉吉先生終於吾鄆分司

送譚訥菴塞河歸村

鍾伯敬作家傳每一傳成令童子越村二十

里送觀觀已復持去予因感歎題其傳

國友宴合集 卷二十 目錄

譚友夏合集 卷二十

嶽歸堂已刻詩選

竟陵 譚元春友夏著

五言律

傳遠度水閣柳下作（同唐宜之茅止生徐牟父）

開共家家水柳環兼柳穿爲陰覆良晤下露濕遲眠文物既相命愚蒙如自專一酣莫易視稽阮潔身年

夜泛秦淮得愁字（同潘景升冒伯麟洪仲章）

十萬簾中戶燈光照去舟人人知有夜事事不會愁稍傍野花岸細看新漲流屢宵心澹豔皆未藉篔簹

偶出寺伯敬坐至暮留三詩于壁而去

雖出仍留戶知君必午來居然書是主自可榻無猜硯濕吟方去舟陰棹未回高天如此向何肯惜風雷

又過青海林塘（同子丘茂之）

聽隙得山根攔邊何必言蕪塘風雨去苔路霽陰存似野能留鳥常閑不用關幾入城裏步移必到君園

吳鏡父七夕招泛烏龍潭尋雨至就泊茅止生森閣（同冒伯麟許無念宋獻孺洪仲章）

寒潭久不響雷雨作其聲野篴蒼蒼亂秋陰汨汨生電隨汲出入燈與閣昏明天上重今夜定然橋處晴

伯孔客廣陵寄懷

知君久欲返愁說上維揚親老千餘里身存幾日糧高蹶添客累憔悴值秋涼我欲尋江船悠悠路更長

送伯孔還湘潭

豈不深相念。送君亦旅中。入江鴻雁後。爲客柳絲同。田舍薄才土。聲名慰侍童。自從聞汝歎。秋露溼新紅。

攝山道中

湖上卽城外。殘荷氣一灣。綠隄午陰後。白日暮光間。與偶遲經塢。雲先自上山。野田沿水去。秋興寺方閒。

京口雨進

汀外轉前隄。長河如短溪。舟輕惟雨熟。秋老是天低。芳草高緣屋。桂花香出蹊。江南吾所憶。不可怨淒淒。

舟夜寄伯敬

世事每同見。知交已半生。記予商飲啄。約爾杜柴荆。此會秋花發。纔離寒雁聲。毗陵江泊夜。燈雨不求明。

徐牟父會約同舟訪之嘉興死去二十日矣解纜傷懷而去

舟來一月遲。存歿失前期。自覺是君友。君家多未知。無言但上岸。欲弔已收帷。亂水浮全郭。人生空有爲。

游十八澗贈石佛僧

雨已離三日。亂溪流若何。僧間有詩積。路誤得幽多。柴少虎相送。花殘猿未過。不攜餘興返。留半與山阿。

近西冷橋邊息舟

湖人一氣合。上下映星辰。近艇不知歸。遠燈如有人。堤邊黃葉步。水外素秋神。過盡歸飛雁。孤烟直到晨。

移宿段橋

橋上行常好。因來橋下眠。秋真在此晚。月尚不遑圓。所有遠山照。無多閒夜船。終宵一人影。頻步兩隄邊。

月坐法相寺門

光芒雖覺滅。能壽亦誠難。林木未通處。雲峯蒼可觀。霜前衣不急。鐘後寺如安。頗有山僧愛。相思黃葉殘。

鄒孟陽移具法相宿月（同王永啓聞子將嚴忍公）

遍倚森森樹。流光溼聲聲。山空有處響。月色不難明。幽侶桐相引。道心泉始生。雖曾聞虎出。肯廢影中行。

答嚴忍公無勸兄弟

未免春湖雜。茲來亦爲秋。見人兄弟好。卽起別家愁。良友山中約。閒踪船上樓。陰晴容易測。火色看漁舟。

一日兩上孤山作

來往無期數。此翁不厭予。請看芳草塚。便是梅花居。萬嶺氣如暇。一湖烟有餘。高人發深省。肅肅者何如。

鄰舟詩贈鄒孟陽李繼仲

內外湖爭碧。朝昏時覺遐。友朋非一處。山水作鄰家。偶逐葑船散。同隨漁火斜。頻呼免相失。橋隔是天涯。

後鄰舟詩贈葉行可陸嗣端諸子

漁父漸能識。二三烟舫回。琴簫浮水去。縑素與鷗來。泊必相依泊。開常不覺開。有幽須互質。久住得新裁。

夜同慧公過宿南屏衡公

踏葉葉盈路。訪僧僧叩扉。夜寒山更黑。冬蚤聲先微。貧共殘齋鉢。閒分一燭輝。昨因良友集。莫負宿城非。

同李長衡尋聞子將龍井山齋二首

楓色紅難已。黃從翠處分。偶然亂葉下。風雨似同聞。谷鳥臨寒路。籬花開遠雲。逢幽無一語。心眼自氤氳。

其二

十里蒼蒼路。非深亦覺遲。陰晴澹山氣。雞犬靜人家。閣生迥溪水。坪香過薜花。紅黃光莫豔。羣動豈無涯。

過韓求仲同出城看吳興山水

欲訪本疇昔。翻因邀始行。到門若雪合。出郭石沙平。帆滿投新口。口口口野泓。此方山照水。落落寸心明。

過王修徵山莊

綠溪天外沒。宜有是人居。殘葉埋深巷。新牕變故廬。心心留好月。夜夜抱奇書。女伴久相失。荒村獨晏如。無錫答茂之見懷即以爲別

好懷向吳越。仲夏至于今。聚散半生事。寒溫一夜心。始知貧賤好。能在友朋深。以汝贈若雪。如予寂寂吟。過沈雨若蔣樹得觀字（同伯麟比玉子丘）

湖上遊雖遍。來茲不改觀。敗荷依水盡。落木與霜安。洲凍樓臺影。人分魚鳥寒。豫知宜雪際。光滿爾荒欄。送丘長孺還麻城

我尙逢君發。江帆有後先。家雖同在楚。會亦不知年。歎盡疆場事。來思筆墨緣。亦知髻落落。終未屑歸田。太保周公舟枉草堂賦贈（時同令弟華翁）

一舫移風俗。來非爲辟疆。愛予能共被。携弟亦循牆。閣燭搖眠鷺。庵鐘定薄霜。誰堪榆柳分。冉冉學松長。蘭如兒訪題麗人畫爲贈

客寫娟娟影。君來輟筆時。聞君真未貌。持此卽相貽。畏月穿疎竹。依花隨半池。不將神韻想。猶謂畫差肥。送王明甫南遊

愛遊吳越地。亦欲令君遊。到卽登牛首。歸須問虎丘。寡求宜作客。無繫始知幽。暫減良朋跡。林園且莫秋。寄林茂之書適塘堤成

開鑿由冬霽。陂塘入雪深。此身隨舂插。多事是園林。設字如停月。通庵不借陰。訖工應報爾。寄爾一年心。集劉繩之宅留別公安諸子

村巷行未盡。歸路滿明朝。最後君來晤。相同卽久要。杯涼城響隔。雨止草光遙。欲結花源夏。江城數日消。



瘞老僕八齋公詩

孤亭二載內。木訥運齋心。用盡老農力。俱爲鐘磬音。僧衰思茗粥。主出慎園林。般若是何物。那須識字深。

聞鍾叔敬恹卒于伯敬南邸傷心賦此

既知兄友愛。何至使傷神。且尙爲人子。得無憂老親。焦桐空一尾。瘦鶴不多身。良藥同寒骨。匆匆達四旬。

送魏定如還南儀曹與伯敬同部

兩年江上下。有似客頻遊。官况值茲日。客心方欲秋。地天新主禮。霜露故臣愁。爲語鍾祠部。樂亡當細求。

雪夜與譚納庵同宿

茲夕讒同臥。相憐非但今。積寒隔年雪。殘火老人心。持我身邊襦。添君夜半衾。殷勤翁未覺。默默向翁深。

久雪後同弟正則發舟江黃

冰開隨進艇。踪跡向幽堅。明月見今夜。斜陽記去年。陂陀形觸物。燥溼事由天。携汝行空朗。汝心應颯然。

得伯敬南中書作三詩記其新事

人傳君病甚。亦覺久無書。近始來音旨。中仍略起居。藥香諸佛下。歸志一官初。我信田園好。山川或未如。

其二（吳孟子伯敬姬人也書來稱其事佛）

有姬吳孟子。同事古先生。蔬笋藏餘豔。蘭鴛吐一貞。將身依淨域。爲爾識高名。悔往思來世。閨中引導誠。

其三（謂徐元歎蘇州詩人也）

久交恩怨雜。能不廢初心。饑渴求徐子。神明錫好音。厭聞人愛惡。分共我崎嶇。暮得晨馳告。君真此念深。

宿恆度上人庵中兼贈王五嶽

筇杖石倉邊。銅瓶五老前。再歸斬上屋。曰愛主人賢。遊息嚴冰日。牕開細雨天。聲聲不盡聽。飛作一湖烟。

雨過汪闈夫山菴二首

平野度河灣。高低一步間。人稀僮臥徑。僧出客肩關。梵響多依竹。雨聲如下山。只疑白門住。猶未與君還。

其二

欲來非一年。偶泊亦成專。無妬分良友。多憂學昔賢。野空鐘若磬。春淺雨兼烟。頗欲竊游舫。君常起望天。

過馬冲然部齋水亭

蘆荻春相暮。池桑晴亦深。與君看鶴浴。意忽念魚沈。細務存高致。多言表靜心。秦淮今夜水。不及此森森。

寄懷王永啓

小向西湖歷。看君猶衆人。詩從此地易。水見夜來真。天地催人別。鄉閭妬子貧。念予不得已。重浣硯邊塵。

尋林茂之新巷答其詩

十載過君舍。常霑苔竹痕。不知人已易。仍叩舊時門。漸有鄰家出。始將幽巷言。年年花鳥思。如以病爲恩。

丹陽夜步逢賀氏諸仲

泊來無可訪。屣履月光中。深夜交難卒。危時路不窮。捨舟蹤跡幻。近燭貌言同。何似袁宏夕。猶因咏史通。

送陳沂公會試

不可無茲捷。良期得第難。當予羣聚好。反覺北行寒。世路防終熟。人情慎始安。與君戎馬內。出處各思寬。

別朗伯自用前韻

何處可深對。將無負妙蹤。幸成橋上屋。未遠草堂鐘。春近連舟動。天寒贈布重。孤帆不帶雪。鴉與夕陽從。

僧寒碧見過

跡無僧遠到。枉自說林幽。甚愛孳孳意。專爲皁皁謀。天寒衣履夜。年富性情秋。約至園成日。來當數月留。

喜伯敬自白門到家

寒河一步地。白下七年人。門巷君難記。芳菲我亦春。素心晨夕願。慈力盛衰因。野水長林外。非甃不結鄰。

漢江看放燈懷黃美中

萬光迎舫入。生滅總無歸。因念山中友。能堅物外扉。孤燈存磊落。滿月助希微。縱值滔滔際。何妨耿耿輝。

官舟紀夢（有引）

往歲夢與鍾伯敬同一官舟泊岸登嶺。伯敬指示余曰。此閩中山水也。奇麗照人。顧視其山上有一子雲碑。數年來屢述茲夢。不省何驗。今伯敬官闈學使。予送之黃州。舟泊赤壁。在山水影中。臨發將別。吾友王子雲忽投刺相顧。恍然。人生豈能任意自行一步耶。賦詩一章。庶幾迷行妄想。不復萌作焉爾。

今君官與地。前五六年知。并此舟中客。鑄成夢裏碑。牧人心有慧。石馬耳無奇。可不翻然悟。空成擾擾爲。得蘇州徐元歎書。

自顧無相識。書常報汝安。庶幾君不病。寂寞事多端。日月空山急。身心落葉乾。想應初見處。必在萬峯盤。

其二（前二語示歎事也）

巖裏逢高衲。下山辭故遊。志嘗聞子勇。生益念人浮。燈火物相警。風霜天正愁。書來惟一恨。追我昔江頭。戲爲納侍兒詩和服膺。

頓覺身翔貴。多拘不自由。慚非珠賜號。僭用玉搔頭。蓬怒無良勸。工歎有近憂。閩涼諸舊性。枕簟亦宜幽。

其二

屢將衾枕換。後者或多疑。女子誰知靜。家人聽所宜。竹斂教不學。花路步原知。侍立無他伴。森森弟與姨。

寄盧非敖初度

何能不五十交爾亦多年。喜慍全由己。榮枯隨笑天。迂宜常帶怪。老莫遂忘顛。盡改園中舊。君來似夢然。

留二十九舅過夏以初秋別去因柬三十四舅

老年勿僕僕。且息我林端。敢效嘉賓讌。如添老母餐。殘書同坐臥。先德慰艱難。歸有古農父。忙持子粒看。

遠韻弟寄書歸訊答懷

汝閑雖堪上。嗟予季在他。弟兄真不易。亭館是如何。提遠諸陰足。宵涼一卷多。治生非盡拙。近效見菱荷。

齋堂秋宿

寒暑兩無接。眠宜就一堂。齋明欽夜氣。夜靜沃秋涼。蟲響如成世。鷄鳴不近牆。此衷清擾擾。弘願學耕桑。

晦夜同弟姪妹堵庵宿

骨肉聚纔半。房廊紛有人。一齋迎朔望。羣動謝宵晨。禮簡希冥力。情疎入往因。微躬何足省。甘苦爲慈親。

伐先人所種柳爲真公置菴園內名曰柳菴

居士庵初踐。先人柳未枯。罪難辭剪拜。恩益想劬勞。露電過前事。食烟失舊株。吾師勤施鳥。亦以慰巢無。

遠韻弟新居作

移家上五里。快比聚云何。行作他村往。來如遠友過。鶯花人各致。伏臘事增多。差勝王居士。東臯尙隔河。

哭舊督學師周鉉吉先生終於吾鄆分司

全宅爲桃李。何曾見夏陰。且將羊舌泣。灑到馬融心。風雪晨村急。江流夜舫深。茫茫投孝愛。靈魄去焉尋。

送譚訥菴寒河歸村

此行筋力憊。緩步似將難。僦蹇資翁返。迎門望客安。光輝杯酒覺。造化口口干。首向吾家過。春遊稍有端。

鐘伯敬作家傳每一傳成令童子越村二十里送觀觀已復持去予因感歎題其傳後

亦覺君家傳。宜君此際成。文章攢後死。花果結前生。天在淵中寫。聲從影外驚。桑林霜雨內。相念至殘更。

嶽歸堂卷之二十終

譚友夏合集 卷二十

朋友夏合集 卷二